



15. november 2024

Inatsisartut ingerlatsinermut maleruagassaasa § 37 imm. 1 tunngavigalugu matumuuna ukunannga Naalakkersuisunut apeqquteqaaterparpunga.

Naalakkersuisunut apeqquteqaatit:

1. **Naalakkersuisunut iluoornerseq ilumuunnginnersorluunniit uppernarsaqquneqarpoq, ilumut Kommune Kujalleq september 2024 Isumaginninnermut aqutsisoqarfimmut/Naalakkersuisunut kissaateqarsimasooq allaffeqarfiup ilaani isumaginninnermut tunngasuni immikkoortortaqarfiup kommunemit akisussaaffigiunnaarnissaanik?**
 - a. **Naalakkersuisut saaffiginnissuttip oqaasertai tamakkerlugit ilanngussatut apeqquteqaatinnut ukununnga akisummut ilanngussinnaavaa??**
2. **Naalakkersuisup arlaata aningaasanut tunngasortaa akisussaaffigaa Isumaginninnermut aqutsisoqarfiup kommune Kujallermut ikiuunnerani meeqqanut-, inuusuttunut- aamma innarluutilinnut tunngasunut sullissinnermi?**
3. **Naalakkersuisut suliniuteqarpat aaqqiissutissatut pilersaarummik taaneqarsinnaasumik aallartitsisinnaallutik, qanoq Kommune Kujalliup meeqqanik-, inuusuttunik- aamma innarluutilinnik sullissinerup akisussaaffigileqqinnissaanut?**
 - a. **Naalakkersuisut piffissamik aalajangersimasumik taasisinnaanerpat, qaqugu kommunip akisussaaffik tigoqqissaneraa?**
4. **Naalakkersuisut oqaluuserisamut soqutiginaatilinnik allanik paasisutissiisinnaanerlutik?**

(Inatsisartunut ilaasortaq Anna Wangenheim, Demokraatit)

Tunngavilersuut

Meeqqanut, Inuusuttunut, Ilinniartitaanermut, Kulturimut, Timersornermut Ilageeqarnermullu Naalakkersuisooq Inatsisartuni 13-11-2024 apeqqarissaarnermut atatillugu oqarpoq, Kommune Kujallermi isumaginnittoqarfimmut ikiuinnermut aningaasartuutit matussuserneqarnissaanut Aningaasaqarnermut Akileraartarnermullu Naalakkersuisooq taassumalu Aqutsisoqarfia akisussaasut.

Oqaaserineqartoq uanga isumaqatiginngilara. Missingersuinnermut – aammalu naatsorsuuserinnermut inatsit malillugu Naalakkersuisooq aqutsisoqarfimmut akisussaatinneqartup aningaasat aqunnissai akisussaaffigivaa. Allatut oqaatigalugu tassa imaappoq, Kommune Kujallermut ikiorsiineq isumaginninnermut aqutsisoqarfimmeersoq, taamaalilluni Meeqqanut, Inuusuttunut, Ilinniartitaanermut, Kulturimut, Timersornermut Ilageeqarnermullu Naalakkersuisooq akisussaasuusoq aningaasartuutigineqartut akisussaaffigalugillu aqunnissai, Isumaginninnermut aqutsisoqarfiup ataaniimmat.

Demokraatit ernumassutigaat, qanoq Kommune Kujallermut ikiorsiinerup nunatta karsianut sunniuteqassanersoq kiisalu kommunit sinnerinut qanoq kinguneqarsinnaanersoq. Taamatut oqareeralarluta, isumaqatigaarput, meeqqanut, inuusuttunut innarluutilinnullu ikiorsiigasuarinissaq pisariaqartoq qulakkeerneqassasorlu.



Pisoq ilungersunartorujussuuvoq ullorlu manna tikillugu inissisimaneq aatsaat taamaattoq nalaanneqarluni, kommuni ingerlataqarfimminit akisussaaffiarnaqarluni Naalakkersuisullu sullissinermut akisussaaffik tigullugu. Taassuma kinguneraa, uagut Inatsisartutut, nuna tamakkerlugu aningaasaqarnermut inatsimmik akuerseqataasartutut, ingerlatsiviup aningaasatigut sinaakkutaasa inissisimaneranik nalornilersitsisumik. Tassungalu ilutigalugu uagutsinnut pingaartuuvoq, tamat oqartussaaqataanerat aallaavigalugu suleriuseq ataqqineqarlunilu malinneqassasoq. Taamaattumik kissaatiginarpoq, Naalakkersuisut ilumoornersoq ilumuunnginnersorluunniit uppersarsassagaat september 2024-imi Kommune Kujalliup borgmesteriata oqaaserisaasa imarisai. Tassanissaaq pingaaruteqarluinnarpoq paasissallugu, kommunalbestyrelsip tamarmiusup ilisimaarisimanageraa, saaffiginnissut kommunip aqutsineranik akisussaaffimmik tigungmiunnaarnissaanik kinguneqartussaasoq.

Apeqquteqaatima ullut suliffiusut qulit iluanni akineqarnissaaq qilanaaraara.